

115 年全國語文競賽臺中市複賽臺灣原住民族語言朗讀文章 【知本卑南語】 高中學生組 編號 4 號

maw na maraimarmaran na pawmiēn

intaw mu maw na iniyan za turuma'an na temama, venaaw kanatu alrak na pituwa lra tu 'ami. nu mukuwa ziya salrangan kanatu ali'an mukuwa kivantavang mu, mupanana muruma' intaw mu trempa kani turuma'antaw na kiruwaday kani punapunan mu, salaw kana 'azi penauwa zi nantu anger i savak mu salaw kana salremsem. inia mu maw a tu vilinaw na alrak zi mukuwa kikaruna a azu kana wari nintaw inuvasukan na lremak. maw izu natu helran zatu waitrasan za kissiya zi, iniyan za wari milralrang kantu alrak kenama, mahelrahelr kiruwaday kantu ruma'. i makadadalan mu silrevang mianger kana tu alrak za mekan nay? zi traatrangis awa? zi tu anger mu 'azi pakaretra', zi medek lra kanatu awayan kikaruna, zi padingwangwa muruma'. maw mu ini na alrak salaw mazalram za anger, amanan na silrevang tu kuwayaw, maw mu nantu anger 'azi kema, silrevang, tu kuwazuwaw lra kimipiya kanatu kiyakarunan zi muruma'.

medek lra i ruma'mu, izu na alrak mu alrupe' lra, intaw mu payas mengad atra'alr atu anger. ini natu ulepan kanatu inuwayan kikarun zi inuwaveliyan muruma', nantu ulepan mu 'azi lra pakakuwa tu zazek. uri kalralrupe' mu, munamun lra madakedak, kana traruv i makasavak mu, kazu

a sakisiyan a pawmiēn muatelr ! “ini na alrak mu!” kanatu 'ilremesan mu mukuwa kana tu alrak na alrupe' zi tu wayaw taptapaw tu tezek. “mazu kemani u ma'ulid mianger, kemani u matulas na'ui na sitrawvan milritra' lra zi ta paramesanay kani eman?” ini nantu kinuwaniyan kana tu alrak mu zatu kininatrayan i turuma'antaw ngawngaway kemani maselru temenged kanantu alrak. “'azi ku.....”kema zi mangesasenges marengay, “'azi ku matulas, ini... inia mu vaveray kaninu ama za nu akanen keravi.”

ini na alrak natu ikuania mu penauwa kanatu tuki kantu waruma'an ni temamataw zi paruzang parevias za zuwa kisiyan za pawmiēn, zi na saya kisi mu tu kanaw, na saya kisi mu, tu vaveray kani temamataw. maw mu makaud za piwari muruma' i temamataw zi kalralritek lra, maw na tu puwanay i traruv i savak 'aziya lritek. kinger i temamataw 'azi marengay za emaemana, tu uwayaw avayaw emaret, zi mena'u kanizu na maresemak na pawmiēn, “wa! aku alrak, inia mu maw na mara'imaramaran na pawmiēn kania i punapunan!” na lralrak kara makitenga lra mu, ulra tu samadan, maw izu na maza'izangan nu pamelri maselru kananta lralrak mu, ta kauringetraw ta anger marengay ta kananta alrak za, “irayan! pamelri ku.”

最美味的泡麵

一個單親爸爸撫養七歲的小孩。出差當天，要趕火車，匆匆離家，但一路擔心著孩子。不時打電話回家。處理完事情，踏上歸途。回到家時孩子已經熟睡了。正準備就寢時，棉被下有一碗打翻了的泡麵！他在盛怒之下，打兒子的屁股。原來孩子特地泡了兩碗泡麵，因為怕爸爸那一碗涼掉，放進了棉被底下保溫。他抱住孩子，看著那一半的泡麵，「啊！孩子，這是世上最美味的泡麵啊！」

如果父母錯怪了孩子，要勇敢地向他們說：「對不起！」